

## Mbunda - Kutsa Visoneka - Free from Death Scriptures

Loma 6:23 Omwo fweto ya vuvi inapu kutsa, oloni vwana vwa Njambi vunapu mwonyo wa myaka yoshe muli Kilistu Yesu Mwene yetu.

Loma 8:2 Omwo lishiko lya Munzinzime, lije litunenela mwonyo muli Kilistu Yesu, linanjipatula ku lishiko lya vuvi na kutsa.

2 Timateo 1:10 oloni ololo vanacisholola kuli yetu akwija kwa Muyoyesi wetu, Kilistu Yesu. Ikeye namanesa nzili ya kutsa, co a muzimbu nasholola mwonyo uje kuwesi kutsa.

Yombi 5:2 Ulinakulipesa yove vavenya kutsa na cishota-mbunge, cinapu ca vulema.

Hoziya 13:14 Kunjikasa kwamena vanu ava kutunda ku vukalo vwa vatsi, nameme kuvovola ku nzili ya kutsa. Yove kutsa, nena mishongo yove, yove vukalo vwa vatsi, nena kunyongesa kwove. Kunjikazivila vanu ava mema ku mbunge.

Myaso 9:13 Njizivileko mema ku mbunge yove Shukulu Kalunga! Kenga muvali nakunjiyandesela vitozi vange, njamene ku kutsa yove Shukulu Kalunga,

Yombi 6:26 Yeni muyongola kuvayesa majwi ange, munayongola ngeci vyendeka vyva munu wa seo, vinalifu na lihunzi lyakuhuwa.

Yombi 33:22 ali muyehi nakuya ku lifuti lya vatsi.

Ezekiyele 37:12,13 Ngecivene, ambulula vuka-kwimanena kuli vanu vange va Isalele valeke ngwove yange Kalunga wa Akamwa ya Vyoshe, njikashokolola vimbumbo vyavo. Njikavatundisamo, nakavelwisa mu lifuti lya Isalele. 13 Omo njikashokolola vimbumbo muje muvatsindile vanu vange, nakuvatundisamo, co vakazivuka ngeci yange njapwa Kalunga.

Mateo 27:52 vimbumbo lalo vyashokolokele, co vaka-kujela vavangi vaje valalele muje vasangukile.

Kushangumuka 2:7 Asinoni Shukulu Kalunga Njambi watapwile livu asi, co likelyo wamungile munu, wahwimininine muku wa mwonyo mu majulu endi, co munu wakele na mwonyo.

Kushangumuka 6:17 Kenga, njikatuma livazi lyakama ano asi mukunyongesa vyoshe vije viyoyao. Vyuma vyoshe vili ano asi vikatsa,

Kushangumuka 7:15 Ku miyati yoshe yakuyoya vambateleko vavali vavali, nkomba na lwavo, ndemba na cali, co voshe vakovelele mu vwato amo na Nowa,

Kushangumuka 7:22 Na vyuma vyoshe vyva mwonyo vije vyakele ano asi vyatsile.

Yombi 12:10 Njambi lika ikeye atwamenena myonyo ya vitanga vyendi, mwonyo woshe wa munu wakala mu livoko lyendi.

Yombi 33:4 Munzinzime wa Njambi ukewo wanjitangele, co muku wa Muka-nzili

yoshe ukewo wananene mwonyo.

Vilinga vya Miluwa 17:25 Nambe kesi kushaka tumupangele cuma cimo, omwo ikeye akaana mwonyo na muku na vyuma vyoshe kuli vanu voshe.

Kujombolola 13:15 Cikashama wamucivali vamutavesele kuhwimina mwonyo mu cifwa ca kamponya wa cikashama wakulivanga, ngeci kaje kamponya kase kwendeka nakutsiya vaje voshe kuvashaka kukalemesa.

Yowano 10:10 Mwizi akaija nakwiva lika nakutsiya nakunyongesa. Njinaija ngeci mukale na mwonyo, mwonyo waungi.

Isaya 28:15 Kuma munayongola ngweni mwalikwata vusamba na kutsa, co munete akulizivasana na lifuti lya vukalo vwa vatsi? Omwo vikajo mukulaela mu makuli eni ngeci amyamene ku vukalu na ku livazi lyakama?

Isaya 28:18 Cikumiyo mwalikumiye na kutsa cikahwa, co lizivasano mwalizivasanene na lifuti lya vukalo vwa vatsi vakalitundisa. Co vukalu vwa mankimba akungwanjanga akamikupula.

Isaya 5:24 Ngecivene, ngwe muvikenye vishati na mwila wakuma mu tuhya, ngecivene, mizi yeni ikavola, na vishani vyeni vikominina nakupekumuka, omwo munavyana vije vyatulongesele Shukulu Kalunga Muka-nzili yoshe, Njambi wakujela wa Isalele.

Njwele 1:12 Mikolovozi ya vushuka vwa vinyu na miti ya mikuyu yajujwama, miti yoshe ya vushuka yajujwama, co inatsi. Kujolela kunahu muli vanu.

Hoziya 13:15 Nameme Isalele alinakukula mwamuvwa ngwe shaku, nifikatuma lihunzi lya ntwima lyakutunda mu mambo mu ngangela, co likomisa masima avo cau na tuvwelu-vwelu twavo. Likapekumuna vyuma vyoshe vyae seo.

Kujombolola 22:1 Asinoni kangelo wanjimwesele ndonga ya mema a mwonyo, yakuvyakuma ngwe kilisitale, yatundile ku litanda lya Njambi na lije lya Muna Manga,

Yowano 4:10 Yesu wamukumbulwile ngwendi, "Nga wazivukile vwana vwa Njambi, co nou akulomba mema akunwa, nga unamulombo, co nga nakwana mema a mwonyo."

Yowano 4:14 oloni woshe anwa ku mema anjikamwana kakazivi lalo lihwila embwe. Mema aje anjikamwana akapwa lisima lya kavwelu-vwelu muli ikeye lije likamwana mema a mwonyo nakumwana mwonyo wa myaka yoshe.

Visimo 13:14 Vilongesa vya muka-mana vyapwa lisima lya mwonyo, ngeci munu atenguluke kutunda ku vinganjo vya kutsa.

Visimo 14:27 Kukomoka Shukulu Kalunga kunapu kavwelu-vwelu ka mwonyo, ngeci munu atunde mu vinganjo vya kutsa.

Ezekiyele 13:17-23 Shukulu Kalunga wendekele ngwendi, "Ololo, muna munu, kenga vanakazi vaje vali akati ka vanu vove vaje vambulula vya vuka-kwimanena. Vaile, 18 co valeke vije vyalinakwendeka Shukulu Kalunga wa Akamwa ya Vyoshe kuli vakevo ngwove, " 'Yeni vanakazi munavindama! Mulinakutungila vanu voshe mikalo ya ku mavoko, co lalo mulinakulingila vanu voshe vinanga vya ku mitwe vya mikalo ya manseno, ngeci vakele na

nzili a myonyo ya vakwavo vanu. Mushaka kukala na nzili ya mwonyo na nzili ya kutsa a vanu vange nakuyipangesa ku nganyo yeni vavenya. 19 Mulinakunjishaula ku mesho a vanu vange, ngeci mushulise mavoko eni na mbale ya maumwa na mikasha yaindondo ya makende. Mukatsii vanu vaje kuvapandele kutsa, nakuyoyesa vaje vanapandele kutsa. Mwambulula makuli kuli vanu vange, co vamitava.' " 20 Evi vikevyo vyalinakwendeka Shukulu Kalunga wa Akamwa ya Vyoche ngwendi, "Njazinda mikalo ya ku mavoko ije mulinakupangesa ngeci mukale na nzili a mwonyo na kutsa. Njikayitononona nakuyitundisa ku mavoko eni, nakupatula vanu vaje mwakele nakupangesa. 21 "Njikatundisa mikalo yeni nakutava vanu vange kupatuka ku mavoko eni a simbu imolika. Asinoni mukazivuke ngeci yange Kalunga. 22 "A makuli eni, mulinakutanganesa vanu vavavwa, vaje kunjashakele ngeci vavulumuke. Mulinakuvindika vaka-vuvi kwecela vuvi vwavo ngeci vayoye. 23 "Ngecivene, ololo vimona vyeni vyenya makuli na vukakwimanena vweni vwakuungumwisa vunahu. Njilinakupatula vanu vange vatunde ku mavoko eni, muzivuke ngeci yange Kalunga."

Njlemiya 21:8 Asinoni Shukulu Kalunga wanjilekele njileke vanu ngwange Shukulu Kalunga nendeka ngwendi, "Tolilileni! Yange Kalunga njilinakumyana vingila vivali mwanguleo, ngila ije itwala ku mwonyo, na ngila ije itwala ku kutsa.

Yombi 34:22 Unehula Njambi kukumwesa milonga yove? Co unatava kulikela kulinga vuvi ndi?

Myaso 16:10 omwo kuukanjiseze mu vukalo vwa vatsi, nameme kutava mukakujela wove ngeci akanyonge.

Myaso 23:4 Nameme nga njenda mukati ka vutsiki mu lisusulungu, kunjikazivi iyova, Shukulu Kalunga, omwo yove uli amo nange! Mulamu wove na mbweti yove vinjizembeleka.

Myaso 30:3 Yove Shukulu Kalunga wanxitundisile mu vukalo vwa vatsi, unanjiyoyesa ngeci kesi njitse.

Myaso 49:15 Oloni Njambi akanjamena, akanjamena ku nzili ya kutsa.

Myaso 56:13 omwo unanjovola ku kutsa, co unanjamena kukunjifungulula. Ngecivene, njenda ku mesho a Njambi, mu ceke cije cilinakutwa ali vaka-kuyoya.

Myaso 68:20 Njambi yetu wapwa Njambi muka-kutwamena, ikeye wapwa Njambi, Shukulu Kalunga uje muka-kutupatula ku kutsa.

Myaso 89:48 Munu iyajo asa kuyoya, co akeneke kutsa? Iyajo asa kwamena mwonyo wendi, ku nzili ya vukalo vwa vatsi?

Myaso 102:19,20 "Shukulu Kalunga wakengele asi oku ali mwili mu mwela wendi wakujela, oku ali mwili Shukulu Kalunga wakengele ano asi, 20 ngeci azive kukemanga kwa vinvinda, nakupatula voshe vaje vavanatumbwila kutsa."

Myaso 116:8 Shukulu Kalunga nanjamena ku kutsa, ikeye nanjisikumuna

misozi, nakutakamesa mendi ange ngeci kesi njitalyangele.

Visimo 10:2 Vufuko vwakuwana mu ngila yaivi kuvwesi na seo, oloni kulongwa kwamena mwonyo wove.

Isaya 26:19 Vanu vetu vaje vanatsi vakayoya lalo! Mivila yavo ikasangukila lalo ku mwonyo. Voshe vaje vali mu vimbumbo, vakenduka nakwimba nakujoleta. Ngwe lime litonolwela asi, ngecivene, Shukulu Kalunga akasangula lalo vanu vaje vatsile laja.

Yowano 5:28,29 Kesi mukomoke a cuma eci, omwo simbu ilinakwija omo vatsi voshe vakaziva lijwi lyendi, 29 co vakatuuka mu vimbumbo vyavo, vaje voshe valingile mwamuvwa vakasangukila ku mwonyo, co vaje valingile mwamuvi vakasangukila ku cihiso.

Yowano 10:28 Njivana mwonyo wa myaka yoshe, co kuvakatsi embwe. Co naumo wai akavacakununa mu livoko lyange.

Yowano 11:43,44 Omo wamanesele kwendeka evi, watambekele na lijwi lyakama ngwendi, "Lazalu, tuukamo!" 44 Watuukilemo, mendi endi na mavoko vyapwile vyakukuta na vinanga vije vivamuzengelele, na ku mesho endi vazengeleko lilesu. Co Yesu wavalekele ngwendi, "Muzitulenivyo ngeci aye."

Yowano 12:17 Vanu vaje vakele na Yesu omo wasanene Lazalu kutunda mu mbumbo nakumusangula ku vatsi vambulwile vukaleo.

Yowano 17:2 Omwo wamwanene moko yakushwana vanu voshe, ngeci aane mwonyo wa myaka yoshe kuli vaje voshe vawamwanene.

1 Kolinte 15:19-26 Nga cinyangavili cetu muli Kilistu cinapu cacivwa a mwonyo ou lika kunau, co kutuvakana vanu voshe ano a kaye cinapande vatuteteleko. 20 Oloni vushunga vwa vyuma evi vunapu ovu, Kilistu vamusangwile ku vatsi, ngwe vemikile ngeci ngwavo vaje vanalala tulo twa kutsa vakavasangula lalo. 21 Omwo kutsa kwezile ali munalume umo, mu ngila eyi vene kusanguka ku vatsi cinaija ali munu umo. 22 Omwo vanu voshe vatsa omwo vali amo na Andama, mu ngila eyi vene voshe vakavasangwila ku mwonyo omwo vali amo na Kilistu. 23 Oloni munu na munu akasangukila na ngila yendi, Kilistu ikeye mushoke wakulivanga ku voshe, asinoni na vaje vanakundama kuli Kilistu, vakasanguka omo akaija. 24 Asinoni kukotoka kukaija, Kilistu akafungulula voshe vaka-kushwana, vaka-moko, na vaka-nzili, co akana Vumwene kuli Ishe Njambi. 25 Omwo Kilistu napande kushika noo Njambi nafungulula vitozi vendi voshe nakuvaka mwisi ya myanja yendi. 26 Citozi wakukotokela yakafungulula ikeye kutsa.

2 Kolinte 1:9,10 Twayongwele ngwetu kutsa vene kuli ali yetu. Oloni eci calingiwile ngeci kesi tulikulaela yetu vavenya, oloni kuvanga ali Njambi lika muka-kusangula vatsi. 10 Watutundisile mu vushonde vwakama vwa kutsa, co ikeye watwovwele, akatwovola lalo, tunakulaeleni kuli ikeye ngeci akatwovola lalo,

2 Kolinte 3:6 Ikeye natwasesa kupangela cikumiyo caciha, cije kesi cakusoneka

mu lishiko, oloni na Munzinzime. Lishiko lyakusoneka linena kutsa, oloni Munzinzime anena mwonyo.

Kolose 1:21,22 A simbu imo yeni mwakele kulyala na Njambi, co mwapwile vitozi vendi omwo vyuma vyavivi vije mwalingile nakuyongola. 22 Oloni ololo, a kutsa kwa Munendi, Njambi namipwisa mu vasamba vendi, ngeci aminene ku mesho endi kupwa vanu vakujela nakulambasa nakujeneka mulonga.

VaHevelu 2:9 Oloni tunamono Yesu, uje ivanapwisa kasimbu kakandondo lika mwisi ya tungelo, ngecivene, mu kutetela kwa Njambi napande kutsila vanu voshe. Ololo tunamumono vanamuziki cilongo ca vumpau na kasingimiko omwo a kutsa kuje kwayandele.

VaHevelu 2:14,15 Ngecivene, omo vana vanatambula ku situ na maninga, Yesu nendi lalo walipwisile ngwe vakevo watambwile cisemwa cavo ca vunu vwa ano asi. Ikeye walingile eci ngeci a kutsa anyongese uje wakele na nzili ya kutsa, ikeye vene Liyavola. 15 Co mu cifwa eci vene akapatule vaje voshe vapwile vindungo mukuyoya kwavo kwoshe omwo lyova lya kutsa.

VaHevelu 11:5 Akukulaela, Inoke\* kamwene kutsa. A ngila ije vene, vamutwalele kwilu kuli Njambi, co naumo wai wamuwanene, omwo Njambi wamutwalele kwilu. Omwo visoneka vyendeka ngwavyo omo Inoke kanda vamutwale mwilu wavwaelelesele Njambi.

1 Petulu 3:18 Omwo Kilistu watsililile vuvi lumo ku simbu yoshe, mukavushunga kutsila vaka-vuvi, ngeci amitwamenene kuli Njambi. Ikeye vamutsiile ku muvila, oloni vamuyoyesele ku munzinzime,

2 Petulu 1:3 Nzili ya vuNjambi vwendi inatwana vyuma vyoshe vije tunajeneka mukuyoya kwakuvwa kwa vuNjambi akutuzivuka kuli uje natusana ngeci tulipangele vumpau na vuvwa vwendi.

1 Yowano 3:14 Tunazivuka ngwetu tunatundu mu kutsa tunakovela mu mwonyo, tunazivuka cuma eci omwo tulinakuzema vakwetu. Vaje kuvesi kuzema anga vacili mwisi ya nzili ya kutsa.

1 Yowano 5:11 Ngecivene, ovu vukevwo vukaleo, Njambi natwana mwonyo wa myaka yoshe, co mwonyo ou uli muli Munendi.

Kujombolola 21:6 Co wendekele ngwendi, "Vyalingiwa laja! Yange wakulivanga na muka-kukotekela, vushangumukilo na mamaneselelo. Njikana mema a vwana mu lisima lya kavwelu-vwelu lya mwonyo kuli woshe uje ali na lihwila.